

**Sud Bosne i Hercegovine**
Суд Босне и Херцеговине

Broj; S1 3 Iž 037674 20 Iž
Sarajevo; 16.10.2020.godine

Sud Bosne i Hercegovine, u drugostepenom vijeću sastavljenom od sudija Dinke Bešlagić Čovrk kao predsjednika vijeća, Vesne Trifunović i Srete Crnjaka kao članova vijeća, odlučujući o žalbi političke stranke Srpska demokratska stranka sa sjedištem u Banja Luci ul. Nikole Tesle broj 1, koja osporava odluke Centralne izborne komisije Bosne i Hercegovine, broj: 05-1-07-1-997/20 od 01.10.2020. godine, o utvrđivanju i objavi broja birača upisanih u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, na nejavnoj sjednici održanoj dana 16.10.2020. godine donio je

R J E Š E N J E

Žalba se odbacuje kao nedozvoljena.

O b r a z l o Ź e n j e

Odlukom Centralne izborne komisije Bosne i Hercegovine, broj i datum navedeni u uvodu, utvrđen je i objavljen broja birača upisanih u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine.

Ovu odluku pobija Srpska demokratska stranka žalbom koju je podnio sekretarijat stranke i žalbom podnesenom od predsjednika Opštinskog odbora Brčko u kojoj navode da je broj registrovanih birača za glasanje izvan BiH na Lokalnim izborima 2020. godine u mnogo veći u poređenju na birački spisak za glasanje putem pošte iz 2016. godine. Analizirajući broj registrovanih birača po gradovima ukazuju da gradovi sa većim brojem stanovnika imaju manji broj registrovanih glasača iz inostranstva i posebno pocrtavaju broj registrovanih birača u Brčko distriktu BiH koji je za 87% veći u odnosu na lokalne izbore 2016. godine. Ove nepravilnosti na izvodu iz Centralnog biračkog spiska ukazuju na sumnju o izbornom inženjeringu, odnosno izbornoj prevari jer se radi o fiktivnim prijavama građana na adresama u inostranstvu. Predlažu da se poništi predmetna Odluka i odredi dodatno vrijeme za provjeru tačnosti navedenih podataka.

Centralna izborna komisija Bosne i Hercegovine dostavila je ovom sudu odgovor na žalbu u kojem je istakla da je žalba izjavljena na odluku čiji sastavni dio je tabelarni prikaz sa ukupnim brojem registrovanih birača za glasnjaje izvan BiH po opštinama. Podnositelj žalbe osim izražene sumnje i indicije na moguću zloupotrebu uočenu od njegovih opštinskih i gradskih odborana nije dokazao na koji način je ožalbena odluka povrijedila pravo ustanovljeno Izbornim zakonom BiH, pa time žalba nije dopuštena u smislu člana 6.2 stav 1 Izbornog zakona BiH. Pored istaknutog nije dostvaljena punomoć niti od jednog registrovanog birača navedneog u žalbi da se u njegovo ime izjavi žalba na pobijanu odluku

Žalitelj kao politička partija pobija Odluku Centralne izborne komisije BiH o utvrđivanju i objavi broja birača upisanih u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine. Dakle, odluka se odnosi na pojedinačnio pravo svakog građanina BiH koji je upisan u Centralni izborni spisak, a privremeno živi u inostranstvu, da u skladu sa članom 3.15 Izbornog zakona BiH, ostvari svoje biračko pravo na način što će biti upisan u izvod iz Centralnog biračkog spiska za glasanje van BiH.

Ožalbena odluka ne proizvodi pravne posljedice na prava političkih stranaka utvrđena Izbornim zakonom BiH i stoga nisu ispunjeni uslovi da žalilac ostvari zaštitu izbornog prava u smislu člana 6.2 stav 1 citiranog zakona, niti pravo da podnošenjem izborne žalbe u smislu člana 6.9 ostvari pravo na sudsku zaštitu.

Iz navedenih razloga žalba je nedopuštena, niti žalilac ima pravnog interesa za podnošenje izborne žlabe u smislu člana 78 Zakona o upravnom postupku BiH (Sl. glasnik BiH br. 19/02 sa izmjenama) jer nema pravnog interesa za pobijanje odluke koja ne povrijeđuje njegova prava utvrđena Izbornim zakonom.

Potrebno je istaći da Zakon o upravnom sporu BiH, čije se odredbe primjenjuju u postupku po izbornim žalbama, u članu 80 stav 1 propisuju da žalbu potpisuje predsjednik ili ovlašteni predstavnik političke stranke. Ova odredba nije u koliziji sa članom 84 Statuta Srpske demokratske stranke koji propisuje da stranku zastupa predsjednik ili jedan od podpredsjednika na osnovu pismenog ovlaštenja predsjednika. U konkrentom slučaju žalba je potpisana od strane generalnog sekretara i predsjednika opštinskog odbora Brčko, međutim nije tražena naknadna saglasnost predsjednika stranke, jer ista ne bi uticala na drugačije rješenje budući da žalba nije dopuštena iz razloga navedenih u obrazloženju ove odluke.

Iz navedenih razloga apelaciono vijeće zaključilo je da žalba nedopuštena u smislu člana 180 stav 2 Zakona o parničnom postupku pred Sudom BiH (Sl. glasnik BiH br. 36/04 sa izmjenama). Stoga je primjenom odredbe člana 191 stav 1 tačka 1 citiranog zakona žalba odbačena, odredbe kojeg zakona se shodno primjenjuju kako je to propisano članom 60 a) Zakona o upravnim sporovima Bosne i Hercegovine (Sl.glasnik BiH broj 19/02 do 83/08).

**PREDSJEDNIK VIJEĆA
S U D I J A
Dinka Bešlagić Čovrk**